



Broj: T18 0 KT 018487 26
Brčko, 03.09.2026.godine

Optužnica potvrđena dana 10.09.2026. godine

Na osnovu člana 35. stav (2) tačka i) i člana 226. stav (1) Zakona o krivičnom postupku Brčko distrikta BiH, podižem:

OPTUŽNICU

Protiv:

VIĆE R., rođen ... 1988. godine u Brčkom,

Što je:

Dana 17.04.2025. godine oko 18,10 časova, krećući se magistralnim putem M-14.1, iz pravca Brčkog ka Bijeljini, kroz mjesto Brezovo Polje, za vrijeme dana sa oblačnim vremenom ali dobrom vidljivošću, suvim kolovozom i ostalim povoljnim uslovima za odvijanje saobraćaja, upravljao pmv marke „Pegueot“, na kojem su se nalazile nepripadajuće registarske oznake O67-J-..., iako pri tome svjestan da se nalazi u stanju očigledne nesposobnosti za bezbjednu vožnju te da tako može ugroziti javni saobraćaj i dovesti u opasnost život ili tijelo ljudi, na šta je i pristao, suprotno odredbi člana 174 stav (1) Zakona o osnovama bezbjednosti saobraćaja na putevima u Bosni i Hercegovini („Službeni glasnik BiH“ broj 6/06, 75/06, 44/07, 84/09, 48/10, 18/13, 8/17, 89/17, 9/18, 46/23, 88/23), sa prisutnom koncentracijom alkohola u krvi kod V. od 1,44 promila, upustio se u upravljanje vozilom, iako se pritome nalazio u stanju srednjeg stepena alkoholisanosti, kada kod njega kao vozača nastupa psihomotorna, vazomotorna i vaskulomotorna oduzetost, stanje svijesti je poremećeno sa smjenjivanjem zanos, rasplinutosti, suženja, pomućenosti i greškama u vremenskoj i mjesnoj orijentaciji, koncentracija i usredsređivanje utisaka je oslabljeno, dolazi do poremećaja govora, zamuckivanja, nesigurnošću u hodu, posrtanju, gubljenju ravnoteže pri sjedenju, stajanju, hodanju i izvođenju koordinisanih radnji, te dolazi do senzomotornih poremećaja u vidu omaglice pred očima, nejasnog uočavanja predmeta i čestim pojavama duplih slika i oslabljenim funkcijama čula sluha, za vrijeme dok se u vozilu kao suvozač nalazio M. M., a na zadnjem sjedištu su se nalazile E. R., N. S. i R. I., upravljajući pri tome nedozvoljenom brzinom od 103,5 km/h u mjestu gdje je dopuštena brzina kretanja bila 80km/h, što je suprotno odredbi člana 44 stav 3) tačka (3) Zakona o osnovama bezbjednosti saobraćaja na putevima u Bosni i Hercegovini, a što je zajedno sa razinom alkoholisanosti u kojoj se V. nalazio dovelo do nekontrolisane vožnje, te odsustva uslova da je vozilo pravilno tehnički vođeno od strane njegovog vozača, pa je, izlazeći iz blage lijeve krivine, gdje iz oba pravca postoji dobra optička preglednost saobraćajnice, koja nije manja od 100 metara, nastupila destabilizacija kretanja vozila, pa je iz približno pravolinijskog translatornog, prešlo u višesmjerno složeno translatorno-rotaciono kretanje, na takav način krećući se djelimično desnom ivicom kolovoza i djelimično desnom bankinom, te udarilo u metalni stub saobraćajnog ogledala i izvalilo ga, usljed čega se vozilo kojim je upravljao V., uz translatorno i horizontalno rotaciono kretanje, započelo zadnjim krajem horizontalno rotirati u smjeru suprotnom od smjera kretanja kazaljki na satu, na koji način udara u stub saobraćajnog znaka „autobusko stajalište“, izvaljuje ga i tom prilikom, uz postojeću horizontalnu rotaciju se počinje vertikalno rotirati oko svoje podužne ose od lijeve prema desnoj bočnoj strani, te se prevrće na desnu bočnu stranu a zatim na desni (više prednji) dio krova kličući tako po tlu uz vanjsku ivicu kolovoza, nakon čega vozilo ponovo dopijeva na točkove i dalje se, horizontalno rotirajući u smjeru suprotnom od smjera kretanja kazaljki na satu, nastavlja kretati koso

udesno, te u konačnici zadnjim dijelom vozila udara u armirano-betonski stub nisko-naponske elektro mreže gdje se zaustavlja prednjim krajem okrenuto u suprotnom smjeru u odnosu na njegov provodni smjer kretanja, tokom kojeg kretanja dolazi do ispadanja svih putnika iz vozila, zbog čega kod M. M. i R. I., usljed brojnog teškog povređivanja momentalno nastupila smrt na licu mjesta, dok N. S. zadobija teške po život opasne tjelesne povrede u vidu preloma II-V-og desnog rebra, prodora zraka u desnu grudnu duplju, višedijelnog preloma gornjeg dijela desne ramene kosti sa pomjeranjem ulomaka, preloma desne lopatične kosti, razderano – nagnječne rane u predjelu okolnice lijevog oka i laceracije desne nadlaktice, a E. R. zadobija teške tjelesne povrede u vidu preloma nosnih kostiju sa pomjeranjem ulomaka, preloma I-og desnog rebra, preloma desne palčane kosti i nagnječenja u predjelu desnog oka, što je sve u uzročno-posljedičnoj vezi sa stanjem u kojem se vozač zbog alkoholisanosti nalazio i njegovog nekontrolisanog i bahatog upravljanja vozilom

dakle, pod uticajem alkohola upravljao motornim vozilom iako je zbog toga očigledno bio nesposoban za bezbjednu vožnju i time tako ugrozio javni saobraćaj, da je doveo u opasnost život ljudi, pa je zbog toga prouzrokovana smrt više lica,

čime je učinio krivično djelo – Teška krivična djela protiv bezbjednosti javnog saobraćaja – iz člana 330 stav (2) u vezi sa članom 327 stav (1) Krivičnog zakona Brčko distrikta BiH.

[...]

****Ovom objavom ne prejudicira se ishod krivičnog postupka i ne narušava princip presumpcije nevinosti.
Svako se smatra nevinim dok se pravosnažnom presudom ne utvrdi njegova krivica.****
